

ի հետ Միհայլին: Եւ յաղթահարեաց Միհայլ զգորքն Իլախի, և նոքա ընկան փախստական. և նա կոտորելով եհաս ի Խողին, ի հետ դնելով. և նոքա ընկան ի գետն որ կոչի Տուրլու, և բազումք ի նոցանէ ընկղմեցան. մինչեւ հաղիւ փախեալ զօրագլուխ նոցա Կուլսքիյ, և ինքն Միհայլ դարձաւ և գնաց ի Սեչոյն, և նստաւ ի պարոնութիւն: Եւ Երեմիա Օլախի պարոն գնաց առ քանցլէրն, որ էր զօրավար երկրիս այս, և աղաչեաց զինքն՝ զի երթիցէ զօրօք իւրովք ի վերայ այդ Միհայլին, և հալածեսցէ զինքն յերկրէն: Եւ յորժամ եմուտ զօրօք իւրովք քանցլէր յերկիրն Օլախաց, իբրեւ լուաւ Միհայլ զգալուստ քանցլէրին, վաղվաղակի եթող զերկիրն և փախեալ. և քանցլէրն չոգաւ զկնի նորա. և նա ելաւ ի վերայ բլրոյ միոյ բարձու՝ զոր անհնար էր ելանել ի վերայ նորա, և անդէն փախ էառ ի Մաճարք: Եւ քանցլէրն դարձաւ ի Մինդանի երկիր, և էառ ընդ ձեռամբ իւրով, և նստոյց զՍիմէոն եղբայրն Երեմիայի փոխանակ Միհայլի. նոյնպէս և զԵրեմիա նրստոյց իւր պարոնութիւն ի Սեչոյն. և ինքն քանցլէր դարձաւ և եկն ի Կամենից, և գնաց առ Թագաւորն: Եւ Միհայլն կորեալ անհետ, և կորոյս զամենայն զօրս իւր ընդ ինքեան՝ ունայնութեամբ:

1602. ԹՎ. ՌԾԱ. Փետրվարի ԻԵ, օրն հինգշաբթի: Մեծ զարմանք եղաւ. զի երկինք որոտաց, զոր բնաւ ոչ էաք տեսեալ և ոչ լուեալ. Աստուած զաւարտն ի բարին առնէ և բառնայ զցասումն և զպատուհասն իւրական արարածոց, նա և ի մէնջ մեղաւորացս. ամէն:

1602. ԹՎ. ՌԾԱ. Աւգոստոս ամսոյ ԺԶ, օրն երկուշաբթի: Փառք Աստուծոյ Հօր անմահի և Որդոյն Միածնի և Ս. Հոգոյն Աստուծոյ հմարտի. այժմ և յաւէտ յաւիտեանս. ամէն: Եւ արդ պարտ և արժան է մեզ զայսպիսի ամենայն ինչ գրով աւանդել, զի առ յապա եկեալքն ընթեռնելով փառս տացեն Աստուծոյ: Ո՛հ, ո՛հ, ո՛հ. եթէ որպէս հրամանն Աստուծոյ եկն ի վերայ մեր, վասն ծովացեալ մեղաց մերոց. այս ինքն է զոր եղև այսմ ամի Կամենից ողորմելի քաղաքիս մեծ և անողորմ ցասումն պատուհասի հրոյ, որ բովանդակ և ամենայն քաղաքն հրկիզ այրեցաւ ի փոքր և ի սուղ ժամանակի. ամենայն ինչ մարդկային ազգի այրեցաւ, եթէ տներ, եթէ խանութներ. ոչ թէ միայն փայտեղէն չէնք՝ այլ և քարուկիր շինուածք, եթէ խանութներ, եթէ տներ մեծագոյնք և եթէ սքիւրներ (կրպակ, խանութ), ամենայն բարութեամբ, որչափ ինչ ոք ունէր՝ բովանդակ այրեցաւ: Եւ քանզի մեծ և ահադին էր ցասումս այս, զի բնաւ ոչ կարացին դէմ կալով չիջուցանել զհօրն, քանզի իբրեւ կայծակունն հրոյ բորբոքելով այրէր և տոչորէր զքարինս և զփայտս. այլ և մարդիկք փոքր ի շատէ այրեցան. այլ և մարդասիրութիւն Աստուծոյ՝ որ գիշեր չէր բանս այս, այլ երեկոյին ժամուն էր, մինչեւ նսեմացաւ՝ ամենայն քաղաքն փոշի և մոխիր դարձաւ: Այլ եւս այս մեծ պատուհաս էր, զի եկեղեցիք Հայոց այրեցան, և զանկաններ հալեցան ի մէջ պուրճերուն. մեծ և ողորմելի կսկիծ եղաւ վասն հրաշալի և